

Parada carnavalesco pa Hildward



Ayera tabatin un rij largo di personanan cu a dispidi di Hildward Croes cu a keda crema na Colombia. Awe tin un otro oportunidad na Plaza Betico Croes. Pero prome su restonan ta bay riba e trailer conoci di su Dushi Band y ta forma un parada carnavalesco. Por lesa den e edicion aki kico ta e ruta di e parada. **Les mas riba pagina A2**

Parada carnavalesco pa despedida Hildward Croes

ORANJESTAD – Awe tardi e restonan di Hildward Croes ta sali riba su trailer di Dushi Band pa forma un ‘parada’ chikito den un forma carnavalesco.

Asina famia y amigonan kier duna un homenahe na e artista cu a fayece siman pasa despues di perde un bataya contra cancer. Ayera tabatin e prome ocasion unda por a dispidi di e musico cu cariñoso ta wordo yama ‘e Principe’. Esaki tabata na Aurora Funeral Home.

Sr. Croes a keda crema na

Colombia unda e tabata pa tratamiento.

E restonan tabata den un urna presenta y un rij largo di hende a bin pa condoleer. Pa motibo cu hopi hende kier mostra nan respet, ta duna awe un otro oportunidad pa dispidi.

Esaki lo tuma luga di 5 pa 7 di anochi na Plaza Betico Croes y lo tin presentacion musical tambe.

Ruta

Prome cu esaki, di 4or atardi lo sali for di Aurora Funeral Home e restonan mortal di Hildward riba su trailer di

Dushi Band. E famia ta laga sa cu lo tuma e ruta direccion aeropuerto, subi rotonde bay rechts direccion Pricesmart, subiendo Avenida Milo Croes te rotonde di Banco di Caribe pa subi Vondellaan y termina na Plaza Betico Croes.

“Dje forma aki nos ta duna Hildward e ultimo oportunidad di recore un parti di e ruta Carnavalesco riba tononan di su Dushi musica. Un y tur ta invita pa homenahe Hildward riba e ruta di un actividad cu tanto el a stima, carga y promove, pa fi-



nalmente riba Plaza nos rindi Homenahe Musical postumo como su despedida. Aki lo tin

e oportunidad pa duna condolencia na su famia y tuma despedida di Hildward.” □